

BON DIA *Aruba*

Diasabra 28 di Januari, 2012 www.bondia.com Email: noticia@bondia.com Tel: 582-7800 Fax: 582-7044 1,50 Florin

BON DIA

LOCAL | A3

Diasabra 28 di Januari, 2012

**Dr. Lydia
Gezaghebber**



ORANJESTAD---"Mi ta cla pa e reto," ta locual Dr. Lydia Emerencia a bisa BON DIA Aruba despues cu a bira conoci cu Consejo di Minister di Hulanda a bay de acuerdo pa nombra e Gezaghebber di Boneiro.

Tabata Minister pa Asuntonan Interno y di Reino Mr. Spies kende a propone Dr. Emerencia, kende tabata Rector di Universidad di Aruba y na ultimo Director di Centro di Investigacion y Desaroyo di Universidad di Aruba, como Gezaghebber, despues cu Dr. Glenn Thode a tuma su retiro.

Continuacion Pag. A3

Futuro Gezaghebber di Boneiro lo traha pa fortifica lazonan cu Aruba

Continuacion Pag. 1

Dr. Emerencia a responde na e solicitud habri, despues cu el a keda acerca pa diferente persona pa haci tal. Mirando cu su tata ta di Boneiro y e tin ainda hopi famia na Boneiro, e tabata califica pa por a solicita, banda di tin tur e credencialnan academico y administrativo pa cumpli cu e funcion.

Segun e relato oficial di Boneiro, hopi hende a reacciona riba e solicitud y for di e grupo a selecciona personanan cu tabata cumpli cu e exigencianan di e perfil stipula. Consejo Insular a institui un Comision di Confianza pa duna resultado di e combersacionnan.

E representante di Reino na Boneiro e ora a conseha e Minister encarga pa Asuntonan Interno pa nombra Dr. Emerencia. Awor cu Consejo di Minister di Hulanda a bay de acuerdo, Su Mahestad La Reina lo mester saca su decreto pa formalmente nombra Dr. Lydia Emerencia como Gezaghebber di Boneiro.

E nombracion lo ta pa un duracion di 6 aña.

Dr. Emerencia a nace na Aruba na 1954 y su tata defunto a nace na Boneiro. Aunke cu Lydia Emerencia a lanta na e isla cu el a nace, el a bisa BON DIA Aruba cu e contacto cu e famia Boneriano semper a keda fuerte, pues e futuro Gezaghebber conoce e isla hopi bon y semper a consider'e su di dos cas.

Pero, mas cu tur cos ta e reto pa contribui na e proceso di Boneiro pa fortifica su posicion como un municipio di Hulanda ta locual a atrae Lydia Emerencia. "Mi kier contribui na e desaroyo di Boneiro y haci uzo di e experiencia cu mi tabatin e honor pa acumula na Aruba."

Y Dr. Emerencia tin hopi experiencia den organizacionnan. Su carera amplio den enseñansa, na IPA, Direccion di Enseñansa encarga cu e proyecto PRI-EPEB y despues ocho aña como Rector di Universidad di Aruba ta dun'e e conviccion cu e lo por cu e trabou como Gezaghebber di Boneiro.



Universidad di Aruba a produci dos Gezaghebber pa Boneiro caba, Glenn Thode y Lydia Emerencia

"Den enseñansa bo ta siña pasenshi y tambe traha cu hende. Mas ainda, mi a haya e capacidad pa analisa situacionnan, y esey ta locual lo mi haci como Gezaghebber, hunto cu e pueblo di Boneiro."

Dr. Emerencia, cu ta mama

di dos yiu, y wela di un niëto, ta anticipando su reto nobo pero ta confia cu su relacion cu Aruba lo sigui fuerte. E lazonan familiar riba su isla natal ta fuerte, mescos cu su lazonan di amistad. Y e lazo di amistad entre Boneiro y Aruba

tambe ta fuerte. "Si ta na mi, e relacion lo bira mas fuerte ainda."

Mi ta spera cu hopi hende di Aruba lo sigui apoya Boneiro. Mi ta boga pa un cooperacion fuerte entre islanan ABC, apesar cu Boneiro ta den un otro constelacion."

En todo caso, apesar di a entrega timon di Universidad di Aruba pa un tempo caba, como Director di e Centro di Investigacion y Desaroyo el a sigui hopi involucra cu e instituto academico local. Pero e ta laga e trabou aki atras cu tur confianza y cu tranquilidad den su curazon. "Tin un team fuerte cu ta traha den e centro. Ademas, Rector nobo Glenn Thode a expresa di ta kere y kier mas investigacion. Esey ta duna un tranquilidad cu mi por bay."

E intencion ta pa Dr. Emerencia huramenta como Gezaghebber entrante prome di Maart cu no ta dun'e mucho tempo pa caba cu tur e trabounan cu e tin pendiente ainda na Aruba. □